

Letsatsi la Lefatshe la ho Balla Hodimo



nalibali
HO QALA
KA PALE.




le Nal'ibali bakeng sa Bana ba Banyenyane !

Selemong sena re mema malapa ohle le bahlokomedi ba bana ba banyenyane hore ba bale le rona ka Letsatsi la Lefatshe la ho Balla Hodimo, e leng la 7 Hlakola 2024 - le letsatsi le leng le le leng. Pale ya rona e kgethehileng, e reng *Ledinyane la katse le lahlehileng*, e ngotswe ke Stacey Fru mme ditshwantsho tsa yona di entswe ke Rico. Pale ena e fumaneha ka dipuo tsohle tsa semmuso tsa Afrika Borwa tse 11. Karate ena ya pale e etseditswe wena ka ho kgetheha!

Pele ho Letsatsi la Lefatshe la ho Balla Hodimo

- 🐾 Tseba pale hantle e le hore o kgone ho e pheta kapa ho e balla hodimo ka tsela ya hao.
- 🐾 Nahana ka tsela ya ho etsa hore pale ena e phele. Etsa qeto ya hore na o batla ponahalo ya sefahleho sa hao e be jwang le ho tsamaisa matsoho a hao jwang.
- 🐾 Kgetha nako ya letsatsi eo bohle ba lelapa la hao ba tla beng ba le teng bakeng sa ho pheta pale.
- 🐾 Fumana dikarolo tseo bana ba ka nkang karolo ho tsona paleng, ka mohlala, ba ka etsa medumo ya ledinyane la katse le ya ntja.
- 🐾 Ikwetlisetse ho pheta kapa ho balla pale hodimo.



Pele o balla pale hodimo

- 🐾 **RSeng** ditshwantsho tsa diphoofolo tse kang dintja, dikatse, mebutlanyana le dikolopata tse ka ruuwang e le diphoofotswana tsa lapeng. E re ngwana ka mong a kgethe setshwantsho sa phoofotswana ya lapeng seo a tla se tshwara ha o ntse o bala pale.
- 🐾 Botsa dipotso kapa o bue ka dinto tse tla thusa bana ba hao hore ba tsepamise maikutlo paleng. Ka mohlala, bontsha foto ya katse kapa ledinyane la katse. Bua ka diphoofolo tseo re di ruang e le diphoofotswana tsa lapeng.
- 🐾 Bala sehlooho sa pale. Botsa ngwana, "O nahana hore pale ee e bua kang?"



Ha o ntse o balla pale hodimo

- 🐾 Ha o ntse o bala pale, botsa bana ba hao dipotso mabapi le yona. Dipotso tse kang, "O nahana hore ke hobaneng ha a entswe jwalo?" le "O ka be o entseng?" di etsa hore ngwana a utlwele ba bang bohloko le ho ba utlwisisa.
- 🐾 E re bana ba hao ba nke karolo ka ho etsa medumo ya diphoofolo.



Boikano ba ho balla hodimo mmoho jwaloka lelapa ka **Letsatsi lena la Lefatshe la ho Balla Hodimo** – le letsatsi le leng le le leng. Ingodise ho www.nalibali.org kapa romela lentse "WRAD" ka WhatsApp ho **0600 44 22 54**. Lelapa ka leng le ngodisang le tla ba le monyetla wa ho kenela **leeto la ho bala la lelapa la Letsatsi la Lefatshe la ho Balla Hodimo la Nal'ibali**. O tla amohela dipale tse ding hammoho le dikeletso le mehopolo ya tsela ya ho bala le bana ba hao selemo ho pota.

Ledinyane la katse le lahlehileng



Pale ka Stacey Fru ☺ Ditshwantsho ka Rico



Ka Labohlano thapama, Neo le Bella ba ne ba ntse ba bapala seratswaneng sa Neo. Noodle o ne a ithobaletse ka kgotso.




Ngao, ngao, ngao! Ha hlahella ledinyane le lenyenyane la katse le mmala wa kgemere dihlahleng. “Bona, e na le kholoro e ntle e mmala o moputswa molaleng,” ha rialo Neo.

Neo le Bella ba le isa katlung.

“Mme, Ntate, bonang! Re thotse ledinyane la katse seratswaneng!” ha hweletsa Neo.

“Le tlameha le na le monga lona hobane le kentswe kholoro molaleng,” ha rialo Bella.

“Re lokela ho leka ho fumana beng ba lona,” ha rialo Ntate.



“Hosasa re ka etsa diphousetara tsa ledinyane la katse le lahlehileng. Mohlomong monga lona o tla bona diphousetara tseo,” ha rialo Mme.

Neo a fumana lebokose la dieta le jesi ya kgale ho etsetsa ledinyane leo la katse bethe e mabothobotho. Ntate a le fepa ha a qeta a le tshella metsi a hlwekileng ka sekotlong se seholo.



Ka Moqebelo hoseng, Bella a fihla e sa le ka matjeke. "A re etseng diphousetara!"


Bella a rialo

Ba ile ba etsa diphousetara tse nne. "A re yeng he re lo di maneha," ha rialo Ntate

Ba qala ka ho ya laeborari...

yaba ba ya lebenkeleng...

yaba moahisani o ba dumella hore
ba manehe phousetara e nngwe
heheng ya hae.




Ba boloka phousetara e le nngwe bakeng sa ho ya e maneha sekolong.

Ka Labobedi thapama, Neo, Bella, Noodle le ledinyane la katse ba ne ba ntse ba bapala ka phaposing ya ho phomola.

Koko, koko, koko! Ho ne ho na le motho ya kokotang monyako.

Noodle a bohola a thabile.

Ledinyane la katse la nyaroha hoo le ileng la mathela ka tlasa sofa ho ya ipata.



"Dumela," ha rialo Neo ha a bona ngwanana a eme monyako.

"Dumela, ke nna Gina," ha rialo ngwanana eo. "Ke nahana hore ledinyane la katse leo le le fumaneng ke la ka. Lebitso la hae ke Ginger."

Empa ha ba sheba ka phaposing ya ho phomola, ledinyane la katse la re na le ne le mpehile kae. "Jonna!" ha rialo Bella. "E se ka mpa yaba ledinyane la katse le lahlehile hape!"

Gina o ne a shebahala a utlwile bohloko haholo.

Jwale ba utlwa Noodle ka kitjhining a bohola. Hobu! Hobu! Ha latelwa ke lerata le leholo la *KEKETEKETE!*





Bana bana ba mathela ka kitjhining. Ledinyane la katse ke leo moo le ituletseng teng. Le ne le dihile sekotlolo sa lona sa metsi ha Noodle a bohola mme jwale le ne le le metsi le re te!

Bella a le phumula yaba o le fa Gina.

Purr, purr, purr: Ledinyane la katse le ne le thabile haholo!

“Wena le Neo le ka tihakela Ginger neng kapa neng ha le batla,” ha rialo Gina.

Sefahleho sa Bella sa kganya kgotso. “Re a leboha!” a rialo.

“Empa ke nahana hore Noodle a se ke a tla le rona,” ha rialo Neo.

Yaba bohle ba dumellana hore eo ke kgopolo e ntle haholo.



Ka mora ho bala pale hammoho, buisanang ka se etsahetseng paleng. Botsa dipotso tse fatang maikutlo ho kgothaletsa bana ba hao ho nahana le ho bua ka dikgopolo tse amanang le pale, ka mohlala, “O ratile karolo efe ka ho fetisisa paleng ee?”

Eba mahlahlaha ka pale!

- 🐾 Bina pina kapa o qape pina ka dikatse le dintja.
- 🐾 Taka setshwantsho sa karolo eo o e ratang ka ho fetisisa paleng.
- 🐾 Sebedisa hlama ya ho bapala ho bopa Ginger kapa Noodle.
- 🐾 Etsa phousetara ya phoofotswana ya hao ya lapeng kapa eo o ka ratang ho ba le yona. Taka setshwantsho sa phoofotswana ya hao ya lapeng. Ngola kapa o kope motho e mong hore a ngole mmala le lebitso la phoofotswana ya hao ya lapeng.



Romela difoto le divideo tsa hao le bana ba hao moo le thabelang pale ya Letsatsi la Lefatshe la ho Balla Hodimo le mesebetsi eo le e entseng ho [#nalibaliwrad2024](https://twitter.com/nalibaliwrad2024) metjheng ya rona ya marangrang!

TheNalibaliChannel

nalibaliSA

@nalibaliSA

@nalibalisa

@nalibalisa

nalibalisa

The Nal'ibali Trust

+27 64 801 5496

Nal'ibali (e bolelang "pale ke ena" ka Sexhosa) ke letsholo la naha la ho balla monate. Tjhebelopele ya rona ke ya Afrika Borwa eo ho yona ngwana e mong le e mong a thabelang pale letsatsi le letsatsi.



nalibali
HO QALA
KA PALE.

Sesotho